

關

學

編

關學編卷三 原編

長安馮從吾仲好纂編

豐川王心敬爾緝重訂

涇水王承烈遜功叅閱

金儒

君美楊先生

先生名天德字君美高陵人肄業太學登興定二年進士第釋褐補博州聊城丞未及赴辟陝西行臺掾尋權大理寺承繼擬主長安簿未幾正主慶陽安化簿尋辟德順之隆德令再辟安化令補尚書都省掾遷轉運司

支度判官。京城不守流寓宋魯間。十年而歸長安。先生自讀書入仕。至於晚歲。風節矯矯。始終不少變。亂後士夫或不能自守。而先生於勢利藐然如浮雲。晚讀大學解。沿及伊洛諸書。大嗜愛之。常語人曰。吾少時精力奪於課試。殊不省有此。今而後知吾道之傳爲有在也。埋沒篆刻中。幾不復見天日。目昏不能視書。猶使其子講誦而朝夕聽之。以是自樂。及有疾。親友往問之。談咲歌詠不衰。曰。吾晚年幸聞道。死無恨矣。卒年七十九。魯齋許先生衡誌其墓銘曰。出也有爲。死生以之。處也有守。不變於時。日臨桑榆。學喜有得。其知益精。其行益力。吾

道之公。異端之私。瞭然胸中。洞析毫釐。外私內公。息邪距詖。俯仰古今。可以無愧。受全於天。復歸其全。尙固幽藏。無窮歲年。子恭懿益昌其家學。爲元名儒。別有傳。

元儒

紫陽楊先生

鑑山宋氏附

先生名負。字煥然。號紫陽。乾州奉天人。母程。嘗夢東南日光射其身。旁一神人以筆授之。已而生先生。父振以爲文明之象。因名曰負。天性至孝。年十一喪母。哀毀如成人。未冠。夢遊紫陽閣。景趣甚異。後因以自號。長師鄉先生吳榮叔。迥出倫輩。讀書厭科舉之學。遂以濂洛諸

儒自期待。金末嘗作萬言策。指陳時病。辭旨凱切。皆人所不敢言者。請闕欲上之。不果。元初隱居。講道授徒。抵

鄆縣柳塘。門生百餘人。叛紫陽閣。

即請風閣

稱紫陽先生。嘗

避兵河朔。河朔士大夫想聞風采。求見者應接不暇。東平嚴實聞先生名數。問其行藏。先生終不一詣。歲戊戌。太宗詔宣德稅課使劉用之試諸道進士。先生試東平。兩中賦論第一。以耶律楚材薦。授河南路徵收課稅所長官。兼廉訪使。既至。招致一時名士。與之議政事。約束以簡易爲事。按行境內。親問監務。月課幾何。難易若何。有以增額言者。先生責之曰。剝下欺上。汝欲我爲之。

耶。卽減元額四之一。公私便之。不踰月政成。時論翕然
謂前此漕司未有也。在官十年。請老於燕之行臺。壬子
世祖在潛邸。驛召先生叅議京兆宣撫司事。累上書請
歸築堂曰歸來。以爲佚老之所。教授著述不倦。乙卯病
革。諭子弟孝弟力田以廉慎自保。戒家人無事。二家齋
醮。引觴大噱。命門人員擇載筆畱詩三章。怡然而逝。年
七十。賜諡文憲先生。博覽強記。真積力久。猶恐不及作
文。務去陳言。以蹈襲爲恥。一時諸老皆折行輩與之交。
關中號稱多士。一時名未有出先生右者。不治家人生
產業。而喜周人之急。雖力不贍。猶勉強爲之。人有片善

則委曲稱獎惟恐其名不聞。或小過失必盡言勸止。不計其怨怒也。初翰林學士姚燧早孤。育於世父樞。樞督教甚急。先生馳書止之。曰。燧令器也。長自有分。何以急爲。乃以子妻之。燧後爲名儒。其學得於先生爲多。元好問譔神道碑。稱爲關西夫子。江漢趙復序其集。稱其志其學粹然一出於正。卽其文可以得其爲人。其見重如此。所著有還山前後集百卷。天興近鑑三卷。韓子十卷。概言二十五篇。硯纂八卷。比見記三卷。正統書六十卷。時宋覲字漢臣。長安人。與紫陽及遺山鹿菴九山數儒論道洛西。弟子受業者甚衆。親歿廬墓。瑞草生塋。

閻趙復嘗稱之曰。天性至孝。德重三秦。才膽而敏。冠絕一時。中統戊戌。徵試中論賦兩科。拜議事官。先是官吏縱肆日久。數侵苦小民。公繩之以法。惕然皆莫敢犯。丙辰春。詣闕陳便宜數事。上悉加納。廉希憲云。宋規循良可與共事。希憲相知公有經濟才。議欲薦列。有嫉其文章名世者沮之。署爲講議官。不就。後徵爲耀州尹。官至蜀道憲副。政聲在在著聞。號鑑山先生。有鑑山補暇集。梓行於世。年七十七卒。

元甫楊先生

先生名恭懿。字元甫。號潛齋。高陵人。天德之子。自少讀

書強記日數千言。會時艱從親逃亂而東。於汴於歸德。於天平。雖間關險阻。未嘗怠弛其業。年十七侍父西歸。家貧假室以居。鄉鄰或繼其匱。皆謝不取。惟服勞以爲奉。暇則力學博綜於書。無不究心。而尤邃於易禮春秋。思有纂述。恥爲章句。儒而止。志於用世。反覆史學以鑒。觀古昔興亡之事。從學者已衆。海內縉紳與父友者。馳書交譽。卽以宗盟斯文期之。年二十四始得朱子四書集註。太極圖小學近思錄諸書讀之。喜而嘆曰。人倫日用之常。天道性命之妙。皆萃此書。今入德有其門。進道有其途矣。吾何獨不可及前修踵武哉。於是窮理反躬。

一乎持敬優游厭飫俟其成功。於潛齋之下自任益重。其志盡變不事浮末矣。赫然名動一時。宣撫司行省以三書記共議事。辟之。皆不就。至元七年。與魯齋許文正公同被召。先生不至。魯齋由國子祭酒拜中書左丞。日於右丞相安童前稱譽其賢。丞相以聞。十年帝遣協律郎申敬來召。以疾辭。十一年太子下教中書。俾如漢惠聘四皓故事再聘之。丞相遣郎中張元智爲書致令。不得已乃至京師。帝遣國王和童勞其遠來。旣入見帝親詢其鄉里族氏。師承子姓。無不周悉。詔與學士徒單公履定科舉之法。先生議曰。三代以德行六藝賓興賢能。

漢舉孝廉兼策經術。魏晉爲文辭而經術猶未之遺。隋
煬始專賦詩。唐因之。使自投牒。貢舉之法遂熄。雖有明
經止於記誦。宋神宗始試經義。亦令典矣。哲宗復賦詩。
遼金循習。將救斯弊。惟如明詔嘗曰。士不治經學。孔孟
之道。日爲賦詩空文。斯言足立萬世治安之本。今欲取
士。宜勅有司。舉有行檢通經史之士。使無投牒自薦。試
以五經四書大小義。史論時務策。夫旣從事實學。則士
風還淳。民俗趨厚。國家得識治體之才矣。奏入。帝善之。
宣統元年。詔安西王相敦遣赴闕。詔與太史
官。明年歷成。授集賢館學士兼太史院事。辭。

歸當歷成進奏日。諸臣方列跪。帝命先生及魯齋起。曰。二老自安。是年少皆受學汝者。故終奏皆坐。畢其說。蓋異禮也。二十年以太子賓客召。二十二年以昭文館大學士領太史院事召。二十九年以議中書省事召。皆辭疾不行。三十一年卒。年七十。先是魯齋提京兆學。與先生爲友。一遇講貫。動窮日夕。篤信好學。操履不苟。魯齋亟稱之。父歿。水漿不入口者五日。襄事遵朱文公家禮。蓋祛桑門惑世之法。爲具不足。稱貸益之。魯齋會葬。歸語學者曰。小子識之。曠世墜典。夫夫特立而獨行之。其功可當肇修人極。聚居六年。魯齋東歸。後治母喪一如

父。三輔士大夫知由禮制自致其親者皆本之先生云。
蕭維斗對誌其墓曰。朱文公集周程夫子之大成。其學
盛於江左。北方之士聞而知者固有其人。求能究聖賢
精微之蘊。篤志於學。真知實踐。主乎敬義表裏一致。以
躬行心得之餘。私淑諸人。繼前修而開後覺。粹然一出
乎正者。維司徒暨公。司徒謂魯齋也。學士姚燧謨神道
碑銘曰。維天生賢。匪使自有。俾拯烝民。爲責已厚。公於
明命。實肩實負。乾乾其行。艮艮其守。師古喪祭。如禮不
苟。三綱之淪。我條自手。推得其類。無倦誨誘。學者宗之。
西土山斗。皇慶中。贈榮祿大夫太子少保弘農郡公諡

文康所著有潛齋遺稿若干卷。子寅字敬伯。博通六經。百氏。累官集賢學士。國子祭酒。在成均講明誨誘終日忘倦。有父風。

維斗蕭先生

伯克呂氏附

先生名𣪠。字維斗。號勤齋。奉元人。天性至孝。自幼翹楚不凡。長爲府史。語當道不合卽引退。讀書終南山。力學三十年不求進。制一革衣。由身半以下。及卧輒倚其榻。玩誦不少置。於是博極群書。凡天文地理律歷筭數靡不研究。侯均謂元有天下百年。惟蕭維斗爲識字人。學者及門受業者甚衆。鄉里孚化。稱之曰蕭先生。鄉人有

自城幕歸者。途遇寇。詭曰我輩先生也。寇驚愕釋去。嘗出遇一婦人失金釵道旁。疑先生拾之。謂曰殊無他人獨公居後耳。先生令隨至門取家釵以償。其婦後得所遺釵媿謝之。世祖初分藩在秦。用平章咸寧王野仙薦徵侍藩邸。以疾辭。授陝西儒學提舉。不赴。省憲大臣卽其家具宴爲賀。遣一從史先往。先生方灌園。從史不知爲先生也。使飲其馬。卽應之不拒。及冠帶迎客。從史見有懼色。先生殊不爲意。後累授集賢直學士。國子司業。收集賢侍讀學士。皆不赴。武宗初徵拜太子右諭德。不得已扶病至京師。入覲東宮。書酒誥爲獻。以朝廷時尚

酒故也。等以病請去。或問其故。則曰。在禮東宮東面。師
傅西面。此禮今可行乎。俄除集賢學士。國子祭酒。諭德
如故。固辭歸。年七十八。以壽終於家。諡貞敏。劉致諡議
畧云。聖王之治天下也。必有所不召之臣。蓋志意修則
輕富貴。道義重則輕王公。蟬蛻塵埃之中。翔遊萬物之
表。不事王侯。高尚其事者。以之。傳曰。舉逸民。天下之民
歸心焉。故必蒲車旌帛。側席以俟其至。冀以勵俗興化。
猶或長往而不返。亦有既至而不屈。則束帛戔戔。賁於
丘園者。治天下者。以之也。於吾元得二人焉。曰容城劉
因。京兆蕭軒。士君子之趣向不同。期各得所志而已。彼

不求人知而人知之。不希世用而世用之。至上徹帝聰。鶴書天出。薜蘿動色。巖戶騰輝。猶堅卧不起。不得已焉。始一至。卒不撓其節。不隳所守而去。亦可謂得所志也已。方之於古。則嚴光周黨之流亞歟。雖其道不周於用。而廉頑立懦。勵俗興化之功。亦已多矣。且其累徵而不起。薨出而卽歸。不旣貞乎。以勤自居。其好古好學之心。不旣敏乎。按諡法。清白守節曰貞。好古不怠曰敏。請諡曰貞敏。詔從之。先生制行甚高。真履實踐。其教人必自小學始。爲文立意精深。言近指遠。一以洙泗爲本。濂洛考亭爲據。關輔之士翕然宗之。稱爲一代醇儒。門人涇

陽第五居仁。平定呂思誠。南陽李木魯。狝爲最著。所著有三禮說。小學標題。駁論九州志。及勤齋文集行世。

同時有呂望字伯克。其先河內人。金末父祐避亂關中。因家焉。伯克從許魯齋學。魯齋爲祭酒。舉爲伴讀。輔成教養其功居多。至元間爲四川行樞密院都事。勸主帥李德輝不殺巴人。感德祠之。知華州。勸農興學俱有成效。累官翰林侍讀學士。致仕卒。追封東平郡公。諡文穆。大德中。河東關隴地震月餘。伯克與維斗各設問答數千言以究其理。居父憂喪葬一倣古禮。魯齋貽書稱其信道力行爲楊元甫之亞云。

寬甫同先生

先生名恕。字寬甫。號渠菴。奉元人。祖昇父繼先博學能文。廉希憲宣撫陝右辟掌庫鑰。家世業儒。同居二百口。無間言。先生安靜端凝。羈紲如成人。從鄉先生學。日記數千言。年十三以書經魁鄉校。至元間。朝廷始分六部。選名士爲吏屬。關陝以先生貢禮曹。辭不行。仁宗初。卽其家拜國子司業。階儒林郎。使三召不起。陝西行臺侍御史趙世延請卽奉元置魯齋書院。中書奏先生領教事。制可之。先後來學者殆千數。延祐設科。再主鄉試。人服其公。六年以奉議大夫太子左贊善召。入見東宮。賜

謂想問繼而獻書歷陳古誼盡開悟涵養之道明年春
英宗繼統以疾歸致和元年拜集賢侍讀學士以老疾
辭先生之學由程朱上溯孔孟務貫浹事理以利於行
教人曲爲開導使得趨向之正性整潔平居雖大暑不
去冠帶母張卒事繼母如事所生父喪哀毀致目疾時
祀齋肅詳至嘗曰養生有不備事有可復追遠有不誠
是誣神也可追罪乎與人交雖外無適莫而中有繩尺
里人借騾而死償其值不受曰物之數也何以償爲家
無擔石之儲聚書數萬卷扁所居曰渠庵時蕭先生與
居南山下亦以道高當世入城府必主先生家士論並

稱曰蕭同。自京師還家居十有三年。中外縉紳望之若景星麟鳳。鄉里稱爲先生而不姓。至順二年卒。年七十八。贈翰林直學士封京兆郡侯。諡文貞。所著有桀庵集二十卷。

從善韓先生

先生名擇。字從善。奉元人。天資超異。信道不惑。其教學者雖中歲以後亦必自小學等書始。或疑爲凌節勤苦。則曰人不知學。白首童心。且童蒙所當知而皓首不知可乎。尤邃禮學。有質問者。口講指畫。無倦容。士大夫遊宦過秦。必往見先生。莫不虛往而實歸焉。世祖嘗召之。

疾不果行其卒也門人爲服總麻者百餘人。

伯仁侯先生

先生名均字伯仁蒲城人父母蚤亡獨與繼母居賣薪以給奉養積學四十年羣經百氏無不淹貫每讀書必熟誦乃已嘗言讀書不至千遍終於己無益故其答諸生所問窮索極探如取諸篋笥名振關中學者宗之用薦者起爲太常博士後以上疏忤時相意卽歸休田里先生貌魁梧而氣剛正人多嚴憚之及其應接之際則和易欵洽雖方言古語世所未曉者莫不隨問而答世咸服其博聞云今祀蒲城鄉賢祠

士安第五先生

先生名居仁字士安涇陽人。幼師蕭維斗。弱冠從同寬甫。恕受學。博通經史。躬率子弟致力農畝。而學徒滿門。其宏度雅量。能容人所不能容。嘗行田間。遇有竊其桑者。先生輒避之。鄉里高其行。義率多化服。作字必楷。整。遊其門者。不惟學明而行加修焉。卒之日。門人相與議易名之禮。私諡曰靜安先生。

悅古程先生

先生名珣字君用。號悅古。涇陽人。隱居不仕。弱冠卽以古學自力。討論六籍。雖祁寒暑雨。造次顛沛。未嘗少輟。

三原李子敬創學古書院。延先生講學其中。遠近從遊者百餘人。循循然樂教不倦。學者稱悅。古先生嘗誡諸子曰。人性本善。習之易荒。古聖賢皆以驕惰爲戒。况凡民乎。集家戒一卷。以遺子孫。著述有遼史三卷。異端辨二卷。雲陽志二卷。樂府文集傳世。李子敬字恭甫。爲人質謹孝友。家素裕。族黨因其資而葬者三十餘喪。婚者八十餘姓。捐千金創學古書院。又割田以生。學士蕭貞敏公爲記。行省止其義。下詔。

關學編卷之三終

關學編卷四 原編

長安馮從吾仲好纂編

明儒

容思賢先生

先生名堅字可久蘭州人初號栢軒後更號容思義取
九容九思也學者稱容思先生生而剛方穎異讀書卽
知正學年十四爲郡諸生見緱山陳先生書銘於明倫
堂有羣居慎口獨坐防心之語酷愛而敬誦之遂慨然

以爲聖賢可學而至。年十七。王父歿。白其父。治喪不用浮屠法。凡當世宿儒宦游於蘭者。無不師之。於經史蘊奧性命精微。不究其極不止也。動作不苟。人以伊川擬之。正統甲子。領鄉薦。明年下第歸。鄉之士大夫多遣子弟就學。先生以師道自尊。教法嚴而造就有等。士類興起。已巳。英廟北狩。應上詔。詣闕上書不報。乃裹糧買舟南游。由齊魯淮楚。以至吳越。訪求同志之士。相與講切。得閻子與白艮輔輩。定交焉。逾年始歸。學益有得。景泰甲戌。登進士。以文名。差纂山西誌。明年誌成。復命尋移疾歸。讀書於五泉小圃。依巖作洞。以爲會友講習之所。

有得卽形於詩。有云風清雲淨雨初晴。南畝東阡策杖行。幽鳥似知行樂意。綠楊烟外兩三聲。論者謂宛然有沂沂氣象。越五年爲天順己卯。選山東福山知縣。福山故僻邑。先生以德化民。刊布小學諸書。令邑人講誦。復以詩歌興之。必欲變其風俗。或謂其迂濶不能行。先生獨謂天下無不可化之人。無不可變之俗。嘗有詩曰。天下有材皆可用。世間無草不從風。始終不少懈。由是陋俗丕變。海邦島嶼。颯颯乎有絃誦風。旣六載。以李文達公薦。超擢知萊州府。廼先生與文達公竟未面也。先生治萊如治福山。時召郡縣官師與燕。俾言志咏歌以申

政教未期月。萊人大化。以憂去。旣禫。不遽北上。乃訪周
廷芳於秦州。訪張立夫於鳳翔。講學求友。孜孜不暇。其
於功名利達澹如也。久之復補南陽。在南陽。慨近世學
者。以讀書媒利祿。階富貴。士尠知聖賢之學。乃倡明周
程張朱與古人爲學之意。建志學書院。聚郡庠及屬治
諸生。親授講說。又以民俗之偷。由未預教。乃遴屬治童
蒙。授以小學孝經文公家禮。教民俗言諸書。俾之講習。
又創刻二程全書。胡致堂崇正辨諸書。俟盈科者給授。
士習翕然改觀。又創節義祠。祀古聖母烈女。以風勵郡
俗。尤嚴遊巫尼。不使假左道傷風化。會有女纓而自經。

以殉夫死者。先生率僚屬師生往弔。爲具棺斂。卜地合葬。已又奏表其閭。由是郡人雖婦人女子皆爲感化。先生爲政。持大體。重風教。不愆功利。不規規於簿書。不以毀譽得失動其心。凡屬吏不法者。卽案問不少貸。民或良或奸。相宜訓治。與民休息。在南陽八年。郡人戴之如父母。其敬畏之至。若家有一段太守者。治行爲天下第一。以直道不能諧時。遂致政歸。乃結廬蘭山之麓。扁曰南村。曰東園。取淵明詩。昔欲居南村。及青松在東園。意授徒講業。相羊塋咏。以自樂。然於時政闕失。民情困苦。則又未嘗不憂形於色。成化甲辰卒。年六十有六。門人

私諡曰文毅先生。性素孝友。治父母喪。一遵古禮。事兄
椿山盡弟道。居家嚴內治。崇禮教。凜然爲鄉邦典刑。與
人尤篤於分義。友人唐知縣廷器貧甚。其歿也。爲具棺
斂以襄事。併志其墓。方伯石公執中曾孫以貧鬻於人。
乃垂涕捐貲贖還。俾主其祀。業師周公麟歿。爲撫其後。
每至其家。坐必避席焉。先生雖未居言路。而屢有建白。
如請修龍逢比干祠墓。請從祀元儒劉因。請旌表孝行。
節義。請開言路。諸封事。皆鑿鑿有關國體。補風化。蓋先
生之學。近宗程朱。遠溯孔孟。而其功一本於敬。嘗言學
者主敬。以致知格物。知吾之心。卽天地之心。吾心之理。

即天地之理。吾身可以參天地贊化育者。在於此。必以
命世大儒自期。而不可自暴自棄。以常人自居。有負爲
人之名。所至從游者衆。多所成立。如同郡董學諭芳。羅
僉憲。詹彭少保。澤孫孝廉芳。秦州周布衣蕙。山西董僉
憲齡。福山張同知猷。南陽柴尙書昇。王文莊鴻儒。熊少
叅紀。張孝廉景純。皆門牆尤著者。郡人陳祥贊云。距釋
排聘。吾道是遵。士趨歸正。鄉俗以淳。繼往開來。遠探濂
洛。文清之統。惟公是廓。彭澤撰墓碑云。先儒謂道自堯
舜以來。至孟子歿。失其傳焉。匪道不傳。學者託之言語
文字。而無深造力踐之功也。至宋周程三夫子出。至晦

庵朱先生始極主敬致知力行之功上繼孔孟之統元
魯齋許文正公我明敬軒薛文清公以篤實輝光之學
繼其絕此固萬世之公議也若我南陽太守容思先生
段公其克尊信斯道而致深造力踐之學者歟論者以
爲知言所著有容思集栢軒語錄行世。

默齋張先生

先生名傑字立夫號默齋鳳翔人父璉工部主事先生
生有異質穎悟過人稍長入郡庠卓然以聖賢自期年
二十一登正統辛酉鄉薦乙丑中乙榜以親老就山西
趙城訓導居官六年惟以講學教人爲事一日薛文清

公過趙城。與先生論身心性命之學。文清公嘆服而去。先生之學。由是益深。值歲祲。捐俸賑饑。雖所捐無幾。亦寒羶所難。景泰辛未。工部公捐館舍。先生徒跣奔歸。喪葬悉以禮。先是里俗多用淨屠法。先生一切屏去。鄉人化之。久之以養母不出。天順癸未。母棄養。旣禫。有司勸駕。先生蹙然曰。吾少也力學。以明道祿仕。以養親。今吾親終矣。而學無所得。尚欲仕乎。遂不復出。因賦詩自責。曰。年幾四十四。此理未真知。晝夜不勤勉。遷延到幾時。益大肆力於學。居恒瞑目端坐。至於移時。起則取諸經。子史朗然誦。或至丙夜後已。最愛涵養。須臾敬進學。

在致知二語。因大書揭座右。造詣日深。弟子從遊者日衆。乃拓家塾以五經教授。學者稱爲五經先生。名重一時。巡按御史某薦先生爲提學僉事。不報。成化乙酉。應天聘典文衡。謝不往。辛卯。茶臺馬公震行部漢南。特遣諸生黃照王宣輩奉書載幣聘先生攝城回學事。先生復書畧曰。天地生人。無不與之以善。聖賢教人。亦無不欲其同歸於善。是知善者人所自有。而自爲之。先覺之覺。後覺。如呼寐者而使之寤耳。但古之學者。從事於性情。而文辭所以達其意。今之學者。專務文詞。反有以累其性情。某今年五十有一矣。方知求之於此。以尋古人

向上之學。雖得其門。未造其域。汲汲皇皇。恐虛此生。嘗
自念僻處一方。獨學無友。每欲遠遊。質正高明。奈有寒
疾。不可以出。况鄉黨小子。相從頗衆。豈能遠及他方邪。
亦謝不往。與臯蘭段先生堅。趙侍御英。河東李學博。景
秦州周布衣蕙。相與論學。而段尤稱契厚。嘗贈以詩。有
云。萬徑千蹊。吾道害。四書六籍。聖賢心。聖賢心學。真堪
學。何用奔馳此外尋。而先生詩中。亦有今宵忘寢。論收
心之句。學者爭傳誦焉。或勸先生著書。曰。吾年未艾。猶
可進也。俟有所得爲之。未晚。乃竟未及著書而卒。是爲
成化壬辰十月十二日。距生永樂辛丑八月十九日。年

僅五十有二。先生爲人篤於孝友。事二親曲盡子道。與兄英爲異母。同居五十年無間言。姊早卒。撫其子若已出。教之成立。御子弟一以禮法。內外斬斬。嘗自讀曰。讀孔孟書。學孔孟事。知有未真。行有未至。惟日孳孳以求其所無負也。其勤勵如此。先生歿若干年。郡守趙公博白兩臺爲先生建祠於家塾之左。以供祀事。長平郭公定爲記。郡倅范公吉稱先生以五經教授。明心學於狂瀾既倒之餘。以四禮率人。挽風化於頽靡不振之秋。以端實淡泊。飭躬砥行。垂休光於千百載之後。可謂一代人物矣。識者以爲實錄云。

小泉周先生

先生名蕙字廷芳號小泉山丹衛人後徙居秦州因家焉年二十聽人講大學首章奮然感動始知讀書問字爲臨洮衛軍戍蘭州守塚聞容思段先生集諸儒講理學時往聽之有聞卽服行久之諸儒令坐聽旣而與坐講旣而以爲畏友有疑與訂論焉段先生勗以聖賢可學而至教示進爲途方段先生曰非聖弗學先生曰惟聖斯學遂殫力就學究通五經篤信力行慨然以程朱自任當時見者亦翕然以爲程朱復出也咸敬信樂從之又受學於清水教諭安邑李公杲得薛文清公之傳

功密存省。造入真純。遂爲一時遠邇學者之宗。有總兵恭順侯吳瑾者。聞其賢。欲延教其子。先生固辭。或問故。先生曰。總兵以軍士役某。召之役。則往役。召之教子。則不敢往。聞者嘆服。其侯亦不能強。遂親送二子於其家。以受教。先生始納贄焉。時肅藩有二樂人鄭安鄭寧者。進啓本願除樂籍。從周先生讀書。其感發人如此。後隱居秦州之小泉。因以爲號。著深衣幅巾爲容。成紀之人薰化其德。稱爲小泉先生。嘗遊西安。與介菴李公錦論學。介菴由是大悟。遂爲關西名儒。渭南思菴薛公敬之。執弟子禮師事焉。秦州守數造其廬。舉鄉飲賓。謝不行。

巡按杜公禮徵求見講太極先天二圖不覺前席嘗正
冠婚喪祭之禮以示學者秦人至今遵之成化戊子容
思先生至小泉訪之不遇留以詩有歷盡巉巖君不見
一天風雪野梅開之句後又贈以二詩云小泉泉水隔
烟蘿一濯冠纓一浩歌細細靜涵洙泗脉源源動鼓洛
川波風埃紫子無由入寒玉一泓清更多老我未除塵
俗病欲煩洗雪起沉疴又云白雲封鎖萬山林卜築幽
居深更深養道不干軒冕貴讀書採取聖賢心何爲有
大如天地須信無窮自古今欲鼓遺音絃絕後關閩濂
洛待君尋何大復謂先生於容思先生其始若張橫渠

之於范仲淹。其後若蔡元定之於朱紫陽也。迨老以父
遊江南。歷年涉險蹤訪。沒於楊子江。人皆稱其孝。而又
重悲其死云。先生初名檜。後更蕙。或作桂。誤。先生門人
甚衆。最著名者渭南薛敬之。秦州王爵。爵字錫之。自少
潛心力學。及長從遊先生門。而知操守。郡守秦公與語
悅之。時與講操守之學。及教後學。切切以誠敬爲本。弘
治初。以國子生仕爲保安州判。君出納公。會計當。日不
憚勞。保安稱平焉。秦公後總督原州。聘君至原三年。相
處如一日。及歸秦。公贈以揚州鹽引數百石。君辭之。而
惡衣惡食坦如也。州人咸稱之。詳載可泉胡公纂宗郡

志中敬之余別有傳

大器張先生

抑之張氏附

先生名鼎字大器別號自在道人咸寧人父廉爲山西蒲州知州先生少從父之任受學於河東薛文清公之門用是日勤勵於聖賢之學諸子百家雖靡不研究而一稟於濂洛關閩之旨文清公深器重之歸補西安郡庠弟子員景泰癸酉以易舉於鄉成化丙戌成進士授刑部主事遷員外郎冰蘖自持推轂詳明甲午出知山西太原府太原爲省會劇郡故稱難治先生游刃有餘循良升三晉郡人德之不忍先生離去故九載考績晉

山西叅政仍署府事。又四載始遷河南按察使。振肅紀
綱。奸貪斂跡。嘗辨指揮董敬等人命之誣。弘治改元。擢
右僉都御史。巡撫保定等府。時畿內多事。盜賊縱橫於
途。行旅戒嚴。先生築牆植樹。自內邱直達京師。由是道
路肅然。至今賴之。值歲大祲。先生給糧賑濟。民免流亡。
辛亥晉戶部右侍郎。尋以病請歸。四年爲弘治乙卯。
卒於家。年六十有五。先生爲人仁厚敬慎。事不苟爲。非
義一介不取。進退惟命。是聽。終身恪守師說。不敢少有
渝越。文清公歿。其文集散漫不傳。先生搜輯校正。凡數
年。稿始克成。乃爲序梓而傳之。至今學者尙論文清必

以先生之言爲徵信云。所著有仕學日記。自在詩文。蠹齋博稿若干卷。先生爲都憲。爲亞卿。皆三原王端毅公。爲冢宰時所推轂。其卒也。端毅公銘其墓。稱其理學傳自文清公。高名可並太華峯。世以爲確論。

時有秦州大參張公銳。字抑之。成化初舉於鄉。父敏。以國子生爲江西布政司照磨。公從之任。受學東白張先生元禎。張先生者豫章名儒也。公由是學益有得。乙未登進士。授刑部主事。歷員外郎。郎中。遷江西吉安知府。在吉安政教兼舉。士習聿興。民用安業。坐忤權貴。謫湖廣漢陽。六載。以兩郡令譽。晉山東左參

政。後致仕居鄉。日進執經諸弟子於庭。講學不倦。鄉間薰德焉。故隴西學者稱爲張夫子。可泉胡中丞纘宗。稱公誠確溫厚本之天性。而多學好古。汲引後進。尤人所不可及云。

介菴李先生

仲白李氏附

先生名錦。字在中。號介菴。咸寧人。幼警悟不凡。九歲失恃。如安成依舅氏韓君智。韓爲擇師教之。端坐終日。不逐羣兒嬉。讀書知大義。日見英發。比成童還。爲諸生受易於鄉先生董君德昭之門。大肆力於學。每試輒爲督學使者所稱賞。後遇秦州小泉周廷芳講學。得聞周程

張朱爲學之要。遂棄記誦辭章之習。專以主敬窮理爲事。又與渭南思菴薛氏。咸陽西廓姚氏。同邑誼菴雍氏。麗澤講習。相勸相規。久之踐履醇茂。閤中學者咸以黃朱稱之。濟南尹恭簡公爲通政時。使秦。聞先生名。延與語。大爲驚嘆。天順壬午舉於鄉。成化戊子遊成均。友天下士。其學益進。大司成邢公讓深器異之。令諸子受業焉。後邢坐事下獄。先生倡六館士伏闕抗章。明其無罪。雖於事無益。而先生之名重京師矣。嘗愛武侯靜以修身。儉以養德。學須靜。才須學。數語揭之座右。以自警。事親色養備至。執喪盡禮。力絀異端。至今省會士大夫不

作浮屠事。實自先生始。爲孝廉居憂時。巡撫余肅敏公
欲延教其子。先生以齊衰不入公門。固辭。余益重之。後
余知其喪不能舉。賻以二槨。先生卻其一。曰不可。因喪
射利也。郡大夫有與之厚者。賻米數十斛。以辭。命無俸
米字。辭。後周廷芳復過省。與先生印證所學。設問辨難。
周爲嘆服。先生解經。平正通達。不爲鑿說。且善誘後學。
諄諄忘倦。出其門者。如李參政崙。劉尙書璣。于知州寬。
董員外養民。及舉人張子渭。李盛。漸被尤深。先生數上
春官。竟不第。成化甲辰。謁選直隸松江府同知。職親戎
牒。夙夜精勤。奸無所售。有脫役垂四十載者。先生始發

之。卽令補伍。雖權貴居間。竟莫能奪。未究厥施。以疾卒於官。是在成化丙午。年僅五十一。貧不能爲棺斂。其僚友賻之。始克歸云。先生性剛介。不妄交接。不苟爲然諾。義之所在。確然自信。不以一毫挫於人。尤重取予。所居僅蔽床席。茹淡服疏。雖至屢空。終不輕有所取。學務窮理性。體之身心。不好立言語文字。以故歿之日。遺稿無存。靈寶許襄毅公爲先生同志友。先生歿十年。襄毅公巡撫關中。屬督學楊文襄公表其墓。文襄公稱先生挺然風塵之表。不苟簡遷就。與世低昂。抱其貞璞。卒以完歸。而督學虎谷王公亦稱其化如和叔辭章外。貧似原

思草澤間。嗚呼。可謂深知先生者矣。

後數十年而有渭南李仲白氏者。名與先生同。字仲白。號龍坡。亦潛心理學。爲諸生時。西蜀龍灣高先生儔署高陵敎事。仲白越疆從受學。與涇野呂先生同門。相切磋焉。正德庚午。領鄉薦。爲宿遷令。著勸農文。勸孝文。以化俗。由是邑多孝子。又以稅餘金買牛。給民耕墾荒地。宿遷人稱爲百年以來一人。遷海州知州。致仕。初擢州時。不能具一花帶。呂先生遺之一圍。後去州抵家。猶是帶也。其清苦如此。嘉靖丙申卒於家。呂先生銘其墓。稱其稟受懿嘉。學求根本云。

思菴薛先生

先生名敬之。字顯思。號思菴。渭南人。生有異狀。長大雄偉。鬚髯修美。左膊一黑文字。深入膚裏。生五歲愛讀書。十一解屬文賦詩。稍長。言動必稱古道。則先賢景泰丙子。獲籍邑諸生。居止端嚴。不同流俗。鄉閭驚駭。稱之曰薛道學。爲文說理而華。每爲督學使者所賞鑒。應試省闈。至十有二次。竟不售。成化丙戌。以積廩充貢入太學。太學生接其言論。咸爲嘆服。一時與陳白沙金稱。由是名動京師。自太學歸。二尊人相繼歿。徒跣奔葬。時大雪盈尺。兼酒踐泥。寧亦不知避。後遂病。足值冬月。輒發。毋

嗜韭毋効終身不忍食韭。成化丙午謁選山西應州知州。先生治應首勸民耕稼紡績。時當東作循察田野。民艱於耕種者資以牛種。民貧負租及不能婚葬者皆助之買牲畜數十給之。乳民令孳息爲養。又務積蔬粟不三四歲粟至四萬餘石。乾蔬數萬餘斤。尋當饑饉應民免於死亡。其旣竄而復歸者三百餘家。皆與衣食補葺其屋廬與處。由是屬邑聞風復者沛然。又立義塚以瘞流民之死於道者。弘治戊申秋南山有虎患爲文祭之。旬日間虎死於壑。己酉春蕭家寨北平地有暴水湧出。一寨幾至沉陷。先生亦爲文祭告。水卽下洩聲如雷鳴。

民免於溺。他德政異政多此類。詳守谿王公譔碑記中。
先生尤雅重學政。數至學舍切切爲言孔孟之旨。由是
應人士始知身心性命之學。奏課第一。弘治丙辰陞金
華府同知。東南學者如陳聰輩數十人皆握衣門牆。居
二年致仕。撰金華鄉賢祠志若干卷。正德戊辰卒。年七
十又四。先生嗜道若飴。老而彌篤。好與人講。遇人無問
人省解不。卽爲說道。人或不樂聽。說亦不置。又好靜坐
思索。凡有所得如橫渠法卽以劄記。所著有思菴野錄。
道學基統。洙泗言學錄。爾雅便音。田疇百咏集。歸來藁。
及演作定心性說諸書。其言多有補於名教云。其卒也。

呂文簡公誌其墓畧曰。初先生致仕家居。以事入長安。柁獲遇於長安之開元寺。因叩先生。先生言蘭州軍周蕙者。字廷芳。躬行孝弟。其學近於伊洛。吾執弟子禮事之。吾入太學時。道經陝州。陳雲達忠信狷介。凡事皆持敬遇之。吾以爲友。凡吾所以有今日者。多此二人力也。柁謁先生者再四。見先生年已七十。日夜讀書不釋卷。聽其論議。皆可警策。隋志則亦今日之博學好古死而後已者也。又謂門人胡大器曰。爲學隆師求友。變化氣質爲本。渭南有薛先生。從周先生學。常雞鳴而起。候門開灑掃。設坐。及至則跪以請教。又謂門人廉介曰。子聞

諸思菴薛子曰。介菴李錦。關西之豪傑也。甘貧守道。好學。至死不倦。今亡矣夫。夫薛子其亦見介菴而興起者乎。其學問淵源如此云。

平川王先生

先生名承裕。字天宇。號平川。三原人。父恕。歷官太子太保。吏部尚書。贈太師諡端毅。爲國朝名臣第一。道德功業載在國史。成化元年乙酉。先生生於河南宜照。蓋端毅公巡撫日也。端毅公七子。而先生最少。方兒時。卽重厚如老儒。恒端坐。不妄言笑。七八歲。作屋隙詩曰。風來梁上響。月到枕邊明。又作先師孔子木主朝夕拜之。春

秋丁巳具香果齋而祭。乃爲齋銘曰。齊不齊。謹當謹。萬物安。百神統。聖賢我。古來脗。齊不齊。謹當謹。太淑人廉知之以白端毅公。公喜曰。此兒足繼志矣。十四五時在南都從莆田蕭先生學。蕭令侍立三日。一無所授。先生歸告端毅公。曰。蕭先生待兒如此。謂不足教耶。公曰。善哉。教也。真汝師矣。先生由是益尊師樂學。遂深造焉。年十七八著進修筆錄。崇仁吳正郎宣序之以傳。年十九應鄉試。督學戴公珊試其文。奇之。丙午年二十二舉於鄉。丁未孝宗登極。召起端毅公爲冢宰。先生侍行讀書京邸。與一時名公遊。由是聞見益廣。學益進。癸丑第進

士曾端毅公致仕。先生予告歸。乃開門授徒講學於釋氏之利堂。至不能容。復講於弘道書院。先生教以宗程朱以爲階梯。祖孔顏以爲標準。語具督學虎谷王公書院記中。蓋先生以師道自居甚嚴。弟子咸知敬學。故自樹而成名者甚衆。久之授兵科給事中。有時政先務等疏。皆切中時弊。兩使藩國饋遺一無所受。歷吏科都給事中。正德初逆瑾專政。羣工多出其門。先生遠之。又上疏乞進君子退小人及諸不法事。瑾怒。罰粟三百石。輸邊。其恨猶未已。會先生以外艱去。始免服除。瑾誅。以原官遷太僕少卿。本寺卿南太常卿。時上南巡。先生夙戒。

牲帛祭品待祀。或曰上方用武無暇於祀焉。用備爲弗聽。及上至。奏祀皆行之。言者愧服。己卯宸濠叛。欲趨南都。大臣分城以守。先生分守通濟門。乃與家人訣別。登城誓死守之。曾有逆黨藏甲兵於櫛以應賊者。先生覺。發服以上刑。都城肅然。壬午世廟卽位。改元嘉靖。論禦賊功。有白金文綺之賜。癸未遷戶部右侍郎提督倉場。尋回部爲世廟所重。賜獻皇帝睿筆清平正直四字。丁亥晉南戶部尙書。己丑致仕。林居十年。惟以讀書教人爲事。當時稱其濟美。有范忠宣繼文正公之風。論薦者無虛日。廟堂方欲召用。而先生已歿。識者於是有蒼生

之恨云。卒年七十有四。蓋嘉靖戊戌五月也。計聞賜祭葬如例。諡康僖。先生性篤孝。能悅親養志。故端毅公愛之特甚。又善事諸兄。諸兄皆殊常友之。時序祀先。唯謹誨諸子姪以道。與人交溫乎可親。而又栗然不可狎。故與之交者咸愛敬焉。與長安高御史應先游久之。贈詩以堯夫正叔與之。蓋服其和粹嚴正不易及也。自少樂多賢友。端毅公尤夙以尚友之道誨之。故一時海內名賢無弗接者。自始學好禮終身由之。故教人以禮爲先。凡弟子家冠婚喪祭必令率禮而行。又刊布藍田呂氏鄉約鄉儀諸書俾鄉人由之。三原士風民俗至今貞美。

先生之力居多。所著有論語近說、論語蒙讀、談錄、漫語、星輶集、辛巳集、考經堂集、庚寅集、諫垣奏草、草堂語錄、三泉堂漫錄、厚鄉錄、童子吟藁、婚禮用中進修筆錄、動靜圖說等書。所述有橫渠遺書、太師端毅公遺事等書。行世。端毅公林居日著五經四書意見、獨攄心得、自成一家。學者宗之。先生著述種種。蓋多本之庭訓云。門人馬光祿理、秦大參偉、郝大參世家、雒中丞昂、張給諫原李憲副、伸、趙僉憲瀛、秦明府寧、王明府佩、李孝廉結。有名。光祿別有傳。

關學編卷五

原編

長安馮從吾仲好纂編

豐川王心敬爾輯重訂

涇水王承烈遜功叅閱

明儒

涇野呂先生

先生名柟字仲木。高陵人。世居涇水北。自號涇野學者。尊之曰涇野先生。父溥。號渭陽。有隱德。先生少儁悟絕人。羈紲爲諸生。受尙書於高學諭儔。邑人孫大行昂。卽有志聖賢之學。又問道於渭南薛思菴氏。充乎有得。不

妄語不苟交。夙夜居一矮屋危坐誦讀。雖炎暑不廢衣冠。年十七八。夢明道程子東萊呂氏就正所學。由是學益進。督學邃菴楊公虎谷王公拔入正學書院。與羣俊茂游。大參熊公李公延教其子。先生辭不獲。乃館於開元寺後。聞父疾卽徒步歸。二公以夫馬追送不及。先生曰。親在床褥。安忍俟乘馬也。父尋愈。搆雲槐精舍聚徒講學其中。二公仍遣子熊慶浩李繼祖卒業焉。弘治辛酉舉於鄉。明年計偕不第。遊成均。與三原馬伯循秦世觀榆次寇子惇安陽張仲修崔仲鳧林縣馬敬臣諸同志講學寶印寺。嘗約曰。文必載道。行必顧言。母徒舉業。

以要利祿。母徒任重。弗克有終。日孜孜惟以古聖賢進德修業爲事。遣弟栖師事伯循。其入學儀式。京師傳以爲法。同邑高朝用時爲地官郎。謂檢討王敬夫曰。予邑有顏子子知之乎。敬夫曰。豈呂仲木耶。自是納爲厚交。乙丑敬皇帝賓天。與諸生哭臨。先生聲出淚下。衆譁爲迂。弗恤也。孫行人歿於京。遺孤不在側。先生衰絰哭。拜弔者。或曰。禮與。曰。禮喪無主。比隣爲主。况師乎。及返葬於鄉。猶是服也。宿棺下三日。哭而相葬事。旣歸。復講學於精舍。從游者日衆。正德戊辰舉南宮第六人。廷對擢第一。授翰林修撰。凡知先生者皆喜曰。今得真狀元矣。

時閹瑾竊政以粉榆故致賀。先生却之。瑾銜甚。自是遜避不與往來。在翰林二年。操介益勵。祿入祇祀其先。父母書問至。必再拜使者受之。退而跪讀。期功喪爲位而哭。門無饋遺。時何粹夫塘爲編修。以道自守。不爲流俗所喜。先生日相切劘。驩如也。會西夏構亂。疏請上入宮。御經筵。親政事。不報。瑾惡其言。益銜甚。乃與粹夫相繼引去。未幾瑾敗。禍延朝紳。人咸服先生之明。家居杜門。謝客者二年。臺省交章薦其往。拒逆瑾卓識偉節。宜召擢大用。壬申起供舊職。上疏勸學。謂文王緝熙敬止。咸和萬民。斯享靈囿之樂。元順帝廢學。縱欲盛有。臺沼我

太祖代取之。人主可不深念。或謂元主之戒傷於太直。先生曰。賈山借秦爲喻。漢文尙能用之。況主上過漢文遠甚。柙獨不能爲賈山乎。疏入上亦嘉納。未幾乾清宮災。復應詔言六事。一曰逐日臨朝聽政。二曰還處宮寢。預圖儲貳。三曰郊社禘嘗祇肅欽承。四曰日朝兩宮承顏順志。五曰遣去義子番僧邊軍。令各寧業。六曰天下鎮守中官貪婪取回別用。不報。先生復引疾去。崔仲鳧嘆曰。古有直躬進退不失其道者。吾於呂仲木見之矣。歸而卜築邑東門外。扁曰東郭別墅。四方學者日集。都御史虎谷王公薦其學行高古。乞代已任。不報。渭陽公

病。先生侍湯藥。晝夜衣不解帶。履恒無聲。如是一年。鬚髮爲白。比卒。哀毀踰禮。旣葬廬墓側。旦夕焚香號泣。門人感之。皆隨先生居。乃與平定李應箕同邑楊九儀輩講古今喪禮。當襄事時。郡守致賻受之。旣而馳幣勾文。辭。門人問故。先生曰。方卒哭而遽懷金爲文。吾不忍也。旣禪釋服。講學於別墅。遠方從者彌衆。別墅不能容。又築東林書屋居焉。鎮守閹廖餽以豚米。却之。廖素張甚。乃戒使者曰。凡過高陵。毋擾有呂公在也。有客以兼金乞居間。先生咲而謝曰。人心如青天白日。乃以鳥獸視耶。其人慙曰。吾姑試子耳。門庭蕭然。無異寒素。世廟卽

位詔起原官。時朝鮮國奏稱狀元呂柟主事馬理爲中國人才第一。朝廷宜加厚遇。仍乞頒賜其文。使本國爲式。其爲外國敬慕如此。上御經筵。先生進講。適值仁祖淳皇后忌辰。口奏宜存黻服禮。罷賜酒饌。朝論韙之。癸未分校禮闈。取李舜臣輩悉名士。時陽明先生講學東南。當路某深嫉之。主試者以道學發策有焚書禁學之議。先生力辨而扶救之。得不行。場中一士子對策欲將今宗陸辨朱者誅其人。火其書。極肆詆毀。甚合問者意。且經書論表俱可同事者欲取之。先生曰。觀此人今日迎合主司。他日必迎合權勢。同事者深以爲然。遂置之。

念新天子卽位。上疏請講聖學。畧曰。學貴於力行而知要。故慎獨克己。上對天心。親賢遠讒。下通民志。天下中興太平之業。實在於此。不報。在史館與鄒東廓友善。甲申。奉修省詔。復以十三事上言。頗過切直。時東廓亦上封事。同下詔獄。一時直聲震天下。人人有真鐵漢之稱。尋謫東廓判廣德。先生判解州。道出上黨。隱士仇欄兄弟遮道問學。有梓匠張提者。役於仇氏。聞先生講喜甚。跽而求教。先生誨以善言。提大悟。昔嘗取人一木作界方。至是遂還其主。仇氏兄弟益爲感動。先生喜。形諸詩云。豈有征夫能過化。雄山村裏似堯時。旣至解。仰堯舜。

故址慨然以作士變俗爲已任。解士子視聖學與舉業爲二。先生曰。苟知舉業聖學爲一。則干祿念輕。救世意重。於是講學崇寧宮。每誨諸士。雖舉業拳拳不離聖賢之學。諸士皆欣然向道。以爲聖賢復出也。曾守缺。先生攝事。不以遷客自解免。恤糶減役。勸農課桑。築堤以護鹽池。開渠以興水利。善政犁然。郡庠士及四方來學者益衆。乃建解梁書院居之。選少而俊秀者。歌詩習小學。諸儀朔望。令耆德者講會。典行鄉約。廉孝弟節義者表其閭。求子夏後教之學。建溫公祠。正夷齊墓。訂雲長集。久之。政舉化行。俗用丕變。丁亥。轉南吏部考功郎中。解

梁門人王光祖謂先生在解三年未嘗言及朝廷事。爲考功躬親吏牘。少司馬王浚川薦其性行淳篤學問淵粹。遷南尚寶卿。久之遷南太常少卿。往太常讌樂甚褻。先生悉革之。乙未遷國子祭酒。先生在南都幾九載。海內學者大集。初講於柳灣精舍。旣講於鷲峯東所。後又講於大常南所。風動江南環向而聽者前後幾千餘人。閩中林穎浙中王健以謁選行中途。聞先生風遂止。乃買舟泛江從之遊。上黨仇欄不遠數千里復來受學。先生猶曰請益於甘泉湛先生。日切琢於鄒東廓穆元菴。願東橋諸君子。時東廓亦由廣德移南。蓋相得甚驩云。

其在國學。益以師道自任。自講期外。尤日進諸生諄諄發明。使人人知聖人可學而至。嘗取儀禮諸篇。令按圖習之。登降俛仰。鍾鼓管籥。洋然改觀。易聽。有以孝廉著者。揭榜示旌。喪者弔而賻。病者問而醫。死者哭而歸骸。其鄉。又奏減歷。以通淹滯。絕請托。以杜倖門。凡監規之久弛者。罔不畢舉。六館僚屬。觀法清慎。諸生皆循循雅飭。一時太學有古辟雍之風。京邸搢紳多執弟子禮從學。而內使大興沈東亦時時聽講焉。其感人如此。人人稱爲真祭酒。臺臣張景薦其德行。文學真海內碩儒。當代師表。丙申。晉南禮部右侍郎。東南學者喜先生復至。

益日納履其門。乃復講於禮部南所。時上將躬視承天
山陵。累疏勸止。不報。署南吏曹。筴疏薦何瑋。穆孔暉。徐
階。唐順之等二十人。入賀。會有論湛先生僞學者。先生
自詣當路曰。聖皇在上。賢相輔之。豈可使明時有學禁
之舉乎。事遂已。時霍文敏爲南宗伯。與夏貴溪故有隙。
時時嘲詬夏。先生乘間諷曰。大臣誼當和衷。過規之可
也。背憎非體。霍誤疑先生黨夏。已先生來闕下。夏已柄
國。數短霍於先生。先生毅然曰。霍君性雖少褊。固天下
才也。公爲相。當爲國惜才。由是夏亦誤疑先生黨霍。會
廟災。自陳遂致仕。然先生終未嘗以此向人自白也。歸

而講學北泉精舍。越四年壬寅七月初一日卒。距生成化己亥四月二十一日年六十有四。卒之日高陵人爲罷市。休寧門人胡大器先至高陵侍疾。遂視殮殯而執喪焉。四方門人聞者皆爲位而哭。先生性至孝友。儉朴事繼母侯色養篤至。室無妾媵。與李淑人相敬如賓。事叔父博如父。歲饑嘗分俸賙其族衆。姊劉家窶甚。時時濟之。憫外祖宋乏嗣。每展墓流涕。從舅瑾寓同州。特訪迂歸。平生未嘗干謁人。亦不受人干謁。不事生產。旣歿家無長物。蓋先生之學。以立志爲先。慎獨爲要。忠信爲本。格致爲功。而一準之以禮。重躬行。不事口耳。平居端

嚴恪毅。接人則和易可親。至義理所執則硜然競烈。置死生利害弗顧也。嘗訪王心齋艮於泰州。趙玉泉初於黎城。每遇同志。雖深夜必往訪。苟非其人。卽一刺不輕投。教人因材造就。總之以安貧改過爲言。不爲元虛高遠之論。門人侍數十年。未嘗見有儉語惰容。論者謂關中之學。自橫渠張子後。惟先生爲集大成云。所著有四書因問。周易說翼。尙書說要。毛詩說序。春秋說志。禮問內篇外篇。宋四子抄釋。史館獻納。南省奏稿。詩樂圖譜。史約。高陵志。解州志。及涇野文集別集傳世。隆慶初。贈禮部尙書諡文簡。

谿田馬先生

先生名理字伯循號谿田三原人弘治戊午舉人正德甲戌進士皆高等初授吏部稽勲司主事尋調文選甫一年卽謝病歸戊寅薦起考功庚辰又送母歸嘉靖甲申復薦起稽勲員外郎尋遷稽勲考功郎中丁亥擢南京通政司右通政戊子又謝病歸辛卯復薦起光祿寺卿甫一年又謝病歸歸十年又薦起南京光祿卿至卽引年致仕乙卯年八十又二其年十二月十一日夜地大震先生卽以是夜卒人皆慟之先生幼敏慧醇雅如成人年十四爲邑諸生卽稱說先王則古昔研究五經

指義多出人意表。弘治癸丑先生年二十矣。曾王端毅公致仕。康僖公以進士侍歸。講學弘道書院。先生卽受講。康僖公所於是。得習聞國朝典故。與諸儒之學。先生一切體驗於身心。與同門友秦西澗偉作告文告先師。共爲反身循理之學。以曾子三省。顏子四勿爲約。進退容止力追古道。康僖公深器異之。一時學者卽以爲今之橫渠也。遂菴楊公督學關中。見先生與康德涵呂仲木大驚曰。康之文辭。馬呂之經學。皆天下士也。是時身未出里中。而名已傳海內。動京師矣。旣如京師。益與海內諸名公講學。其意見最合者。則陳雲逵呂仲木崔仲

鳧何粹夫羅整菴諸君子。於是學日純名日起。所在學者多從之遊。督學漁石唐公爲建嵯峨精舍。漁石作記。稱先生得關洛真傳爲當今碩儒。四方學徒就講者益衆。其教以主敬窮理爲主。士無問少長與及門不及門。無不聞風傾慕者。先生又特好古儀禮。時自習其節度。至冠婚喪祭禮。則取司馬溫公朱文公與大明集禮折衷用之。處父喪與嫡生母之喪。關中傳以爲訓。乃其難進易退之節。人尤以爲不可及。嘗曰。身可絀。道不可絀。見行可之仕。惟孔子能之。下此者須自揣分量可也。仲鳧稱先生愛道甚於愛官。當世以爲確論。往安南貢使。

謂部郎黃清曰。故聞馬先生名。願一見。今不在仕列。何也。黃曰。先生高志不欲官。使人嘉嘆。以去。朝鮮國王奏乞頒賜主事馬某文。使本國傳誦爲式。其名重外夷。若此。先生主事時。上書諫武宗巡遊者二。後伏闕諍益力。杖於廷。員外時。值議大禮。率百官伏闕進諫。世宗震怒。命開伏闕者姓名。百官以先生名爲首。逮繫詔獄。復杖於廷。尋復官。郎中時。奏寢莊擇之奏。卽執政言。亦不從。考察力罷執政私人。廣東人彭澤力主被劾。調用魏校。蕭鳴鳳爲正人。卒不改官。公論翕然。至今稱爲真考功。嘉靖丙戌。分校禮闈。所取皆海內名士。人尤服其藻鑑。

先生喜接人。又喜汲引後生。年七十歸隱商。此書院名益重。來學者遠近踵集。縉紳過訪。與海內求詩文者無虛日。先生疊疊應之不倦。山巾野服。鶴髮童顏。飄然望之若仙人。以是益願侍先生談。諸得詩文者。又願得先生親書。先生不談佛老。不觀非聖書。初年介而毅。方大以直。至晚年則益恭而和。直諒而有容。其執禮如橫渠。其論學歸準於程朱。然亦時與諸儒異同。蓋自有獨得之見云。所著四書註疏。周易贊義。尚書疏義。詩經刪義。周禮註解。春秋修義。陝西通志。與詩文集各若干卷。隆慶間。追贈副都御史。賜祭葬。先生門人最盛。有河州何

承達字成章自號拙菴以歲貢爲清豐縣丞尋棄去讀書前學老而彌篤壽九十有四著春秋井鑑林泉偶得聖訓補註井鑑續編諸書先生嘗寄以詩云楊柳灣頭撫七絃故人零落似飛綿河濱尙有鍾期在青鳥音來動隔年其見重如此

苑洛韓先生

先生名邦奇字汝節號苑洛朝邑人父紹宗號蓮峯成化戊戌進士仕至福建按察副使學識才品當世推重先生幼靈俊異常承訓過庭卽有志聖學爲諸生治尙詩卽著蔡傳發明禹貢詳畧律呂直解見者驚服弘

治甲子以書舉第二人。正德戊辰成進士。拜吏部考功主事。尋轉員外郎。辛未考察都御史某私袖小帙竊視先生曰。考覈公事有公籍在。何以私帙爲。乃奪其帙封貯不檢。都御史爲遜謝。衆皆失色。調文選太宰。托意爲官擇人。欲發視缺封。先生執不可。太宰銜之。會京師地震。上疏極論時政闕失。謫平陽通判。甲戌遷浙江按察僉事。時逆廝錢寧以鈔數萬符浙易銀。當事者斂餽恐後。先生檄知縣吉棠散其斂。卒不餽。宸濠將舉逆。先命內豎假飯僧數千人於杭天竺寺。先生立爲散遣。濠又以儀賓託名進貢。假道衢州。先生召儀賓詰曰。進貢自

當沿江而下。笑自假道歸。詣爾王。韓僉事在此。不可誑也。後三年。深果通鎮守。欲襲浙江。賴前事發。姦不竟逞。先生謂鎮守爲浙蠹。諸不少假。鎮守銜甚。誣奏擅革進貢。誹謗朝廷。逮下詔獄爲民。旣歸。謝客講學。四方學者負笈日衆。世廟卽位。改元嘉靖。詔起山東參議。尋乞休。甲申。大同巡撫張文錦階亂遇害。時勢孔棘。復以薦起山西左參議。分守大同。人皆危之。先生聞命卽行。將入城。去二舍許。逆者使二人露刃迎。且欲燬參將宅以懾之。先生奮然單車入。時諸司無官。鎮人聞先生入。皆感激泣下。人心少安。旣而巡撫蔡公天佑至代州。先生親

率將領令盛裝戎服謁蔡於代。蔡驚曰：公何爲如此？先生曰：某豈過於奉上者？大同變後，巡撫之威削甚。大同人止知有某耳。不身先降禮，何以帥衆？蔡爲嘆服。會上遣戶部侍郎胡公瓚提兵問罪，鎮人聞之，復大譟。先生迂侍郎于天城，以處分事宜。馳白巡撫諸軍，言出於先生信之。始解，翌日首惡就戮。先生謂侍郎曰：首惡旣獲，宜速給賞以示信。庶亂可弭，寧不然？人心疑懼，將有他變。侍郎不聽。先生遂致仕歸。後果如其言。戊子起四川提學副使，尋改右春坊右庶子兼翰林院修撰。其秋主試順天，因命題爲執政所不悅，嗾言者謫南太僕寺

永已丑再疏歸尋起山東按察副使大理左少卿。以左
僉都御史巡撫宣府時大同再變。王師出討。百凡軍需
倚辦。宣府悉力經理。有備無乏。乙未入佐院事。尋改巡
撫山西。時羽檄交馳。先生躬歷塞外。增飭戰守之具。拓
老營堡城垣。募軍常守。以代分番。諸邊屹然可恃。四疏
乞休。復致仕。甲辰復用薦起總理河道。陞刑部右侍郎。
改吏部右侍郎。太宰周公用喜得佐理。翕然委重。丁未
陞南京都察院右都御史。復進南京兵部尚書。參贊機
務。五疏乞歸。是在己酉。益修舊業。倡導來學。居七年。乙
卯會地震卒。年七十七。贈少保。諡恭簡。門人白壁曰。先

生天稟高明。學問精到明於數學。胸次灑落。大類邵堯夫而論道體。乃獨取張橫渠。少負氣節。旣乃不欲爲奇節一行。而識度汪然。涵養宏深。持守堅定。躬行心得。中正明達。則又一薛敬軒也。所著有苑洛語錄。苑洛集。苑洛志。樂性理三解。易占經緯。易說。書說。毛詩未喻諸書傳世弟邦靖。字汝慶。號五泉。幼稱奇童。年十四舉於鄉。二十一與先生同第進士。爲工部主事。權稅武林。比及瓜。有同年趙司李以屈安人病無子。買女婢遺之。拒不受。趙曰。此越女有色者。笑曰。政恐若此耳。旣遷郎中。以建言逮獄。爲民嘉靖。改元起山西左參議。以病免。尋卒。

年僅三十有六。汝慶父子兄弟以學問相爲師友。太史王敬夫銘其墓。稱爲曠世之英。全德之士。所著有五泉集。朝邑志若干卷。

瑞泉南先生

雲林尚氏附

先生名大吉。字元善。號瑞泉。渭南人。正德庚午舉人。辛未進士。授戶部主事。歷員外郎。郎中。浙江紹興府知府。致仕。嘉靖辛丑卒。年五十有五。先生幼穎敏絕倫。稍長讀書爲文。卽知求聖賢之學。嘗賦詩言懷。有誰謂予嬰小忽焉。十五齡。獨念前賢訓。堯舜皆可拜。之語。弱冠以古文辭鳴世。入仕尚友講學。漸棄其辭章之習。志於聖

道然猶豪曠不拘小節。嘉靖癸未知紹興時。王文成公倡道東南。講致良知之學。王公乃先生辛未座主也。先生既從王公學。得實踐致力肯綮處。乃大悟。曰。人心果自有聖賢也。奚必他求。於是時時就王公請益焉。嘗曰。大吉臨政多過。先生何無一言。王公曰。何過。先生歷數其事。王公曰。吾言之矣。先生曰。何。曰。吾不言。何以知之。曰。良知自知之。王公曰。良知却是我言。先生笑謝而去。居數日。復自數過加密。來告曰。與其過後悔改。不若預言無犯爲佳也。王公曰。人言不如自悔之真。先生笑謝而去。居數日。復自數過益密。曰。身過可勉。心過奈何。王

公曰昔鏡未開可得藏垢。今鏡明矣。一塵之落自難住。脚此正入聖之機也。勉之。先生謝別而去。於是闢稽山書院。聚八邑彥士。身率講習以督之。而王公之門人日益進。已又同諸同門錄王公語爲傳習錄。續刻以傳。越丙戌。先生入覲。以考察罷官。先生治郡以循良重一時。當事者以抑王公故。故斥之。先生致書王公千數百言。勤勤懇懇。惟以得聞道爲喜。急問學爲事。恐卒不得爲聖人爲憂。畧無一字及於得喪榮辱之間。王公讀之。嘆曰。此非真有朝聞夕死之志者。未易以涉斯境也。同門遞觀傳誦。相與嘆仰歆服。因而興起者甚多。王公報書。

爲論良知。旨甚悉。謂關中自橫渠後。今實自南元善始。先生旣歸。益以道自任。尋溫舊學不輟。以書抵其侶馬西元諸君。闡明致良知之學。構酒西書院。以教四方來學之士。其示弟及諸門人詩有云。昔我在英齡。駕車詞賦場。朝夕工步驟。追踪班與揚。中歲遇達人。授我大道方。歸來三秦地。墜緒何茫茫。前訪周公跡。後竊橫渠芳。願言偕數子。教學此相將。而尤惓惓於慎獨改過之訓。故出其門者多所成立。蓋先生之學。以致良知爲宗旨。以慎獨改過爲致知工夫。飭躬勵行。惇倫敘理。非世儒矜解悟而畧檢柙者可比。故至今稱王公高第弟子必

荆渭南南元善云。所著有紹興志。渭南志。瑞泉集若干卷。行於世。

時有同州尚公班爵。字宗周。弘治甲子經魁。父衡爲浙江參議。公隨父任。亦從王文成公學。後任安居知縣。谿田先生譔通志。稱公作縣剛果勤勵。政舉民安。著有小淨稿。雲林集。

斛山楊先生

先生名爵。字伯修。號斛山。富平人。初誕時。室中如火光起。人咸驚異之。長。美姿容。身滿七尺。家故貧。年二十始發篋讀書。苦無繼晷資。嘗以薪代。夙夜攻苦。每之隴上。

耕卽挾冊任意欣欣也。居恒念人當以聖賢爲師。一切不崇古昔。何所稱宇宙間。兄靖以掾誤。惟法先生徒步百里外。申厥冤。遂並繫獄。先生從獄中上書辭意激烈。邑令見而驚之。曰奇士也。胡累至是耶。立出之。給油薪費。督之學。年二十八。聞朝邑韓恭簡公講理學。躬輦米往拜其門。公睇先生貌。行行狀也。欲卻之。父蓮峯老人謂曰。意若非凡人。數日叩其學。詫曰。縱宿學老儒。莫是過吾幾失人矣。既省語言踐履。錚錚多古人節。嘆曰。畏友也。同門學者皆自以爲不及。後與楊椒山稱韓門二楊云。年踰三十。督學漁石。唐公始首拔爲邑諸生。嘉靖

戊子秋。應試長安。就食食館。客有遺金者。先生守之。客至。持館人急。先生詰其實。付以金。客謝寡取。先生峻不允。乃敦請家止宿焉。是秋。卽以書舉第三名。明年成進士。授行人。三使藩國。餽贈俱讓不受。或以爲矯。先生曰。彼雖禮來。名重天子。使吾獨不自重。天子使邪。聞者嘆服。壬辰。選山東道監察御史。時權臣當國。草疏將劾之。疏且具。會鄉人有以垂白在堂。勸止者。乃移疾歸。未幾。母歿。毀瘠踰禮。廬墓三年。有冬笋。馴兔之瑞。服闋。家居。授徒講學者。又五年。庚子秋。以薦起。河南道巡視南城。權貴斂避。而所覩時事。不勝扼腕。辛丑春二月初四。

日上封事娓娓數千言。大約天下事內而腹心外而百骸皆受病。足以失人心而致危亂者五。一則輔臣夏言習爲欺罔。翊國公郭勛爲國巨蠹。所當急去。二則凍餒民閔不憂恤。而爲方士修雷壇。三則大小臣工弗覩朝儀。宜慰其望。四則名器濫及縉黃。出入大內非制。五則言事諸臣若楊最羅洪先輩非死卽斥去。所損國體不小。是時中外頗以言爲諱。疏入人皆愕然。上大怒卽逮繫鎮撫司。窮究其詞。拷掠備至。先生一無詘。是日都城風大作。人面不相覩。都人呼爲楊御史風。其感動天地如此。先生身晝夜桎鎖中。創甚血淋漓下。死而復甦。先

是士大夫下獄。並未有所鎖者。乃自先生始。蓋貴溪翊國意也。戶部主事周公天佐。巡按陝西。御史浦公鉉。相繼申救。俱箠死獄中。守益戒嚴。人益爲先生危。而先生處之自若。刑部郎錢公德洪。工部郎劉公魁。吏科給事中周公怡。皆先生同志舊友。先後俱以事下獄。相得甚驩。然自學問相勸勉外。各相戒不得言得罪事。錢先釋獄。先生願有以爲別。錢曰。靜中收攝精神。勿使遊放。則心體湛一。高明廣大。可馴致矣。古人作聖之功。其在此乎。先生敬識之。而乃日與周劉切劘修詣。不少輟。繹四子諸經百家。研精於易。著周易辨錄及中庸解若干卷。

諸所著作畧無憤惋不平語。詩文倡和身世頓忘如是者五年。乙巳秋八月十二日上以受釐故放先生及周劉歸田里而三人者猶相與取道潞水講學舟中。逾臨清始別歸。會熊太宰以諫仙箕忤旨復逮三人獄。先生抵家甫十日聞命卽曰就道親朋揮淚爲別。先生無幾微見顏面身幽圜扉者又三年。丁未冬十一月五日上建醮高岱殿災火圍中恍聞呼三人名氏者。次日釋歸爲民。上之聖明保全諫臣如此。旣歸教授里中。貴人莫得見其面。疏粥敝履怡然自適。己酉冬十月九日卒于家。年五十有七。病革時援筆自誌。又惓惓以作第一等

事做第一等人。教其子孫。無他辭。蓋先生爲人。徑直不阿。而內實忠淳。自少至老。孳孳學問。以韓苑洛馬谿田。爲師。以楊椒山周訥溪劉晴川錢緒山蔡汝濱諸君子。爲友。險夷如一。初終不貳。磨礪精光。展拓胸次。其所涵養者。誠深。以故鼎鑊湯火。百折不回。完名全節。鏗鉤一代。不偶也。彼世之淺衷寡蓄。耽耽以氣節自多者。視先生當媿死矣。先生沒若干年。莊皇帝以世廟遺詔。贈光祿少卿。錄其後。今上用禮官議。諡忠介。

愧軒先生

石谷張氏

正立李氏附

先生名潛。字時見。涇陽人。號愧軒。嘗謂爲學。必不愧屋。

漏方可爲人因取號以自警云。父應祥嘉靖壬辰進士。爲禮科都給事中。以論宮寮事奪官。爲時名臣。先生幼穎敏。讀書卽解大義。嘗秘書克己銘懷袖中。時爲展玩。稍長從都諫公任。師事蜀進士趙木溪氏。聞木溪氏講義理之學而悅。於是學甚力。歸又師事涇野呂先生。深幸其得所依皈。凡一言一動率以涇野爲法。於是學益力。而舉子業亦益入理。爲邑諸生試。每傾曹偶。學使者重其文行。拔入正學書院。以風多士。嘉靖丙午。以詩薦鄉書。卒業成均。友天下士。而名日起。時朝紳中有講學會。每聞先生偕計至。亟延之講。先生刻意躬行。遠聲色。

慎取予。一毫不苟而尤嚴於禮。諸冠婚喪祭咸遵文公
惟謹。卽置冠與祭器式必如古人。或以爲迂弗恤也。先
是母柏孺人病於京。先生扶母病西歸。劑醫百至。孺人
病革。以先生且弱。冠命之娶。先生娶而不婚。日夜苦處
喪次。旣襄事廬居墓所。服除始完。婚事至孝之名動開
中。事都諫公與繼母張曲盡孝養。都諫公病。至嘗糞以
驗。効則哀毀幾絕。都諫公封事故未留稿。先生走闕下
錄原疏請銘馬文莊公。文莊公亟稱之。事叔父待諸弟
情愛備至。每歲時祭畢。燕諸族人。講明家訓。又率鄉人
行鄉約。人多化之。親黨有窘乏輒憐而周焉。與人交平

易欬治或有過卽面規之而未嘗背言其短嘗與友人
蒙泉郭公郭讀書講學谷口洞中四方從學者甚衆聽
者津津有得咸曰得涇野之傳者愧軒也當道旌異無
慮數十初南祭酒姜公寶建言天下人才多壞於舉人
之時以其身階仕進而上無繩束甄別故易壞也請詔
有司推擇舉人中行誼修者特掄擢風士習於是撫按
張公社等交章以先生名上聞遂辟入京特授國子監
學正時馬文莊公爲祭酒蒙泉郭公亦爲助教乃與郭
公議以涇野先生爲祭酒時所布學約請馬公力舉行
之由是講讀之聲徹於橋門萬歷癸酉調工部司務會

淮海孫公楚侗耿公俱入京。先生數就兩公質所學。同志方依先生爲主盟。乃戊寅六月一病遽逝。年僅六十又二。水部郎葉君逢春狀其行。大司馬確菴魏公銘其墓。宮保李敏肅公爲之傳。皆實錄非溢美。

時從涇野先生學者又有張公節。李公挺。節字介夫。號石谷。亦涇陽人。父幡。官通州同知。公隨之任。會甘泉湛先生講學京師。通州距京師甚邇。公從之游。湛先生教以隨處體認天理。公大有省。無何通州公致仕。公歸而補邑諸生。復受學涇野先生。爲諸生四十餘年。竟厄於塲屋。以積廩行將膺貢。嘆曰。吾老矣。安

用貢爲乃上書督學劉公辭廩。劉公雅知公學行。特加禮遇。仍扁其門曰清風高節。尋奉例遣授訓導職銜云。公爲人方正介直。涇野先生深器重之。嘗贈以詩。有守道不回比舊堅之句。生平不妄交遊。獨與愧軒蒙泉諸君子相講切。日坐南園草屋中。讀書窮理。涵養本原。至老不倦。卽惡衣糲食澹如也。嘗語學者曰。先儒有云。默坐澄心。體認天理。又云。靜中養出端倪。吾輩須理會得此。方知一貫真境。不爾縱事。事求合於道。終難湊泊。不成片段矣。人皆以爲名言。卒於萬歷壬午。壽八十。貧不能葬。李敏肅公捐金助之。始

克襄事云。提字正立。咸寧人。正嘉間。西安郡學生。性孤直。有義氣。不隨時俯仰。會有詔藩郡如故事出諸生分諭諸屬。公以次出某邑。贈遺一無所受。嘗自誦曰。生須肩大事。還用讀春秋。涇野先生歿。又講學谿田馬先生所。往來三原路中。以盜死人。皆惜之。

蒙泉郭先生

先生名郭。字惟藩。號蒙泉。涇陽人。髫髻宇凝重。童時屹若成人。甫八齡。卽知誦讀。諸聲律。時從都諫龍山呂公學。偶試以對句云。曉風拂水面。先生輒應。朝日射巖頭。龍山公計偕。屬受學東橋李公。與龍山公子愧軒先

生同筆研。兩人同肆力於學。卽以聖賢相期許。曰必不爲世俗碌碌者。補邑庠生。聲名蔚起。父母相繼逝。先生侍疾居喪。竭力盡瘁。家計窘甚。而處之裕如。朝夕攻苦。益潛心性命。不韻韻。競雕蟲之技。時蓋未離庠校。而名已蜚三輔矣。邑侯樊高。其行延居講席。或有以千金求居問者。先生峻拒不納。樊侯退而省其私。益用高之嘉靖戊午年。已四十有一矣。始舉於鄉。辛酉冬。以呂師會葬。遂不上公車。一時郡邑爭表其廬。謂得古師弟之誼焉。先生舉孝廉後。猶與愧軒先生讀書龍巖洞中。學益有得。負笈從遊者甚衆。累試春官不第。乙丑謁選河南。

獲嘉學諭。日與諸生講學。課藝多所造就。隆慶庚午。擢國子助教。值馬文莊公爲祭酒。教規肅然。先生贊襄之力居多。時年已五十有六。例不得入臺省。同列欲先生少隱。庚申。應選。先生笑曰。臺省寧可不得。年其可隱邪。僅得戶部主事。朝論偉之。權稅九江。先生處脂潤。皦然不滓。弊剔奸鋤。商旅胥悅。時有監關郡倖某者。墨吏也。束於新令。不得肆。乃妄加污蔑。事聞諸朝。朝大夫共知先生賢。竟爲白其誣。萬歷庚辰。出守馬湖。馬湖西南夷故地。俗陋易囂。先生恩威並濟。禮讓躬先。裸夷數十輩。從其譯。會願望。見先生顏色。歸而愛戴彌切。居未三載。

聞有猶子之戚。念伯兄且老獨居。遂投牒歸。歸田二十餘年。自讀書講學外。他無所事。督學敬菴許先生雅重先生。檄縣延爲鄉飲大賓。先生雖堅遜。恒虛席以待。乙巳六月三日無疾而卒。距生正德戊寅三月十二日。享年八十有八。士大夫及門下士追思無已。以其德履私諡曰貞懿先生。先生學重根本。篤於倫理。而兢兢持敬。自少至老。一步不肯屑越。暇中喜吟詩。卓有堯夫擊壤遺意。有云。學道全憑敬作箴。須臾離敬道難尋。常從獨木橋邊過。惟願無忘此際心。又云。近名終喪已。無欲自通神。識遠乾坤濶。心空意見新。閉門只靜坐。自是出風

塵。又云莫道老來積德難。古人雖老志不朽。富公八十
尙書屏。武公九十猶求友。老來聞道未爲遲。錯過一生
寧不忤。從此努力惜分陰。毋徒碌碌空白首。觀此則知
先生享上壽而完名全節非偶然矣。先生與人言每依
大節而出之。藹然可聽。令人不忍別去。雖新進少年延
見必恪。生平手不釋卷。冠履几榻悉列箴銘。而晚年尤
喜讀易。所著有自警俚語。山居雜詠。語畧族譜。仰鄭堂
集。仲子九有。殺青以傳。九有乙未進士。以猗氏令擢禮
部主事。未究其用而卒。人皆惜之。

秦關王先生

先生名之士。字欲立。號秦關學者。稱秦關先生。其先咸寧人。五世祖志和。遷居藍田。其後子孫因家焉。父旌。號飛泉。官代邸教授。明理學。有語錄藏於家。先生幼承庭訓。七八歲。卽知學。教授公授之毛詩。二南輒解。輒爲諸弟妹誦之。教授公喜有子。後治大戴禮。兼通易爲諸生。以文名庠校間。嘉靖戊午。舉於鄉。己未。試春官。不第。由是益肆力舉業者累年。後屢不第。幡然改曰。所性分定。聖道遠人乎哉。一曲經生。華藻奚爲。遂屏棄帖括。潛心理窟。毅然以道學自任。爲養心圖。定氣說。書之座右。閉關不出者九年。蒿牀糲食。尚友三古。行已必恭。與人必

敬飲食必祭必誠兢兢遵守孔氏家法一時學者以爲藍田呂氏復出感慕執經者屢滿戶外士習翕然又謂居鄉不能善俗如先正和叔何乃立鄉約爲十二會赴會者百餘人設科勸糾身先不倦諸灑掃應對冠婚喪祭禮久廢每率諸宗族弟子一一敦行之於是藍田民俗復興萬歷甲戌病痺屬又哭母過毀步履愈艱終喪而嚮道之心愈篤謂非博取遠遊終難進道會仲子守亦與計偕已卯遂復如京是時先生已久謝公車第日與諸同志講學都門之蕭寺崇正闢邪力肩斯道卽時貴或譚及二氏輒正辭距之不少假旣而道鄒魯瞻闕

里徧拜先師及諸賢祠墓低回留之不忍去夢寐如見其人久之始歸由是秦關之名動海內矣凡縉紳莅茲道茲者罔不式廬願見表厥宅里云歲乙酉德清許敬菴先生督關中學講學正學書院先生故許先生同志友也禮徵先生爲多士式先生亦樂就許先生合志同方相爲切劘時多士皆有所興起後許先生以應天丞謫歸先生亦南遊講學出武關浮江漢而下迂道江之右會南昌章子潢新城鄧子元錫廣信衢州楊子時喬殷子士望復東渡浙水見許先生於德清東南學者聞先生至多從之遊先生二子宗容念先生疾客久肅迎

歸。是在己丑秋。明年庚寅八月卒於家。壽六十有三。目
欲瞑。以手示二子爲訣。亦曾子啓手足意也。先是南司
成趙公用賢。在史王公以通相繼疏薦。趙疏海內三逸
公居其一。疏云。孝弟力田。行不踰乎軌範。詩書敦悅。名
已動於鄉閭。雖久嬰足疾。而過廬者必式。宜如近王敬
臣故事。授以京秩。俾表帥一鄉。矜式後學。便。在史疏大
畧與趙符。命下。宗伯議。議如薦者。指先生爲孝廉。垂三
十餘年。竟不仕。角巾野服。悠焉終老。至是詔授國子監
博士。除目至。而先生已先物故。四越月。一命不待。君子
惜之。先生生平修姱。惇倫篤於行誼。丁內外艱。毀幾滅。

性處弟第怡怡。未五旬失耦。誓不繼。鰥居終身。其於世俗聲色嗜好。一切漠然。性不問家而好施。喜活人。或謂貧所濟幾何。則曰。吾盡吾心力耳。置祠祭墓祭二田。爲宗族置義倉義田。卽楹晦無多。實貧士所難。居恒晦迹却埽。卽郡邑以幣交。未嘗苟受。亦未嘗輕謁。至於訪道求友。雖跋涉間關數千里。亦不憚遠云。先生篤信好學。見徹本原。非沾沾一節一善以成名者。世或止以甘貧苦節稱先生。是豈足盡先生哉。所著有理學緒言。信學私言。大易圖象卷。道學考源錄。易傳詩傳。正世要言。正俗鄉約。王氏族譜。正學筌蹄。闕里瞻思。關洛集。京途集。

南遊稿所述有先師遺訓先君遺訓皇明四大家要言
性理類言續孟錄諸書行世。

關學編卷之五終